

Charla riba nos descendencia na Sta. Cruz

Segun arkeologonan e restonan humano mas bieu cu a wordo saca for di profundidad di tera tabata un hende muhe. Y nan a duna esey e nomber di 'Eva'. Te cu awe 'Eva' ta wordo considera como e antecesor di henter humanidad. Esey no ta kita cu den futuro por bay descubri un otro skelet cu lo resulta di ta mas bieu cu 'Eva'.

Historia verbal ta conta loke ta wordo traspasa di boca pa boca. Escritura sa trece echonan documenta.

Asina e historiado Hulandes Johan Hartog ta confirma den su buki Aruba zoals het was, zoals het werd cu e pueblo Arubiano ya desde aña 1795 a keda forma entre e habitante original Indjan y e colonisado Europeo. Otro prueba ta cu documentonan di Iglesia Protestant na aña 1843 ta indica cu nan iglesia tabata con-

sisti di 411 miembro di cual 108 tabata Europeo y 303 Mestiso (mescla di Indjan cu e Europeo). Considerando e hecho cu den e epoca ey e habitantenan di e isla tabata considerablemente Catolico, ta un indicacion cu mester por tabata tin mucho mas Mestiso bibando na Aruba.

Den curso di tempo storianan por bay ta cambiando, pero testnan di laboratorio semper ta determinante. Testnan di sanger ta identifica enfermedadnan. Pero pa yega na e identidad di un persona ta rekeri testnan di DNA y mitochondrial. E resultado ta indica exactamente kico ta bo marcanan di herencia y kico ta bo descendencia geografico. Pa medio di un material cu ta wordo yama 'genes' caracteristicanan ta wordo traspasa di un generacion pa otro.

Conhuntamente cu un in-

stituto renombra na Caracas (Instituto Venezolano de Investigaciones Scientificas: IVIC) y Universidad de Puerto Rico, nos investigado di poblacion genetico dr. Oswald Raymond Wever a studia e structura di nos poblacion desde aña 2000 te cu 2011. E meta principal di dr. Wever tabata pa yega na e origen etnico/geografico di e poblacion Arubiano.

Pa yega na e 'Most Recent Common Ancestor' (MRCA) o sea e antepasado mas recien y comun, estudio genetico ta prescribi cu mester haci uzo di 'fam' pa comproba cu e origen geografico di un pueblo ta bay bek te pa tanto generacion. Pa tal motivo mester a forma un lista di fam cu a cubri tanto e epoca di Colonisacion como esun di Sclavitud. Esaki a bira e base di e investigacion di e structura genetico di e pobla-

cion Arubiano.

Pa siglonan largo historiadonan a pretende cu e poblacion di Aruba tin dos origen: Europeo y Africano. E investigacion mitochondrial DNA cu dr. Wever a realisa a bin trece na cla cu e di tres origen di e poblacion Arubiano 'Indjan o Amerindio' nunca a keda ex termina. Na aña 2011 dr. Wever a constata cu a pesar di e mescla, e poblacion Arubiano tabata consisti ainda di 53.3 % di e haplogrupo D locual ta coresponde cu e grupo etnico : Indjan o Amerindio. MRCA ta indica: un periodo di miles di aña. Pa haplogrupo D esey ta nifica: 34.000 aña. Kiermen cu haplogrupo D, e Indjan o Amerindio ta existi sigur ya pa 34.000 aña. Y pa medio di e mama, pa generacionnan cu ta bin, e marcanan di herencia - den e caso specifico aki - 'haplogrupo D' lo sigui wor-

do traspasa directamente pa tur yiu: tanto homber como muhe.

E 'Charla di dokter Oswald Wever' na Club Don Bosco Noord tabata sumamente satisfactorio. Fundacion Herencia Historico di Aruba (FHHA) cu sosten di UNOCA ta continua cu su serie di 'Charla riba nos descendencia' riba diadomingo 14 juni proximo for di 10:00'or di mainta te cu 12:00'or di merdia na Centro Curason Santa Cruz (ex- Credit Union).

E charla ta bay wordo hiba den idioma Papiamentu. Entrada ta gratis. Durante e mainta aki lo tin pasa boca crioyo di Aruba. Un boca bisa otro. Bin scucha kico ta e descendencia di Aruba su poblacion.

"Esun cu no busca su raiz, lo no sa su destino" (proverbio di e tribu Indjan Navajo) □